

VENDIM
Nr. 157, datë 19.3.2026

**PËR KRIJIMIN, ORGANIZIMIN DHE FUNKSIONIMIN E QENDRËS PËR
HAPJE DHE DIALOG**

Në mbështetje të nenit 100 të Kushtetutës, të nenit 10, të ligjit nr. 9000, datë 30.1.2003, të pikës 1, të nenit 12, të ligjit nr. 87/2025, “Për buxhetin e vitit 2026”, dhe të nenit 6, të ligjit nr. 90/2012, “Për organizimin dhe funksionimin e administratës shtetërore”, me propozimin e Kryeministrit, Këshilli i Ministrave

VENDOSI:

I DISPOZITA TË PËRGJITHSHME

1. Krijimin, organizimin dhe funksionimin e Qendrës për Hapje dhe Dialog, “COD” (shkurtesa e emrit në anglisht “*Center for Openness and Dialogue*”), si një institucion juridik publik, në varësi të Kryeministrit, me seli në Tiranë.

2. COD-i është institucion buxhetor dhe financohet nga:

- a) buxheti i shtetit;
- b) burime të tjera të ligjshme.

3 COD-i ka për mision promovimin dhe zhvillimin e një shoqërie të hapur dhe të institucioneve më pranë qytetarëve, shoqërisë civile dhe aktorëve të fushës së shkencës dhe artit, i cili realizohet nëpërmjet mbështetjes së projekteve dhe programeve përkatëse.

**II DETYRAT FUNKSIONALE TË DREJTORISË SË PËRGJITHSHME TË QENDRËS
PËR HAPJE DHE DIALOG**

COD-i, për të realizuar misionin, përcaktuar në pikën 3, të kreut I, të këtij vendimi, kryen detyrat e mëposhtme:

a) Bashkëpunon me ministritë e linjës, institucionet e varësisë, shoqërinë civile, përfaqësitë e huaja, institucionet ndërkombëtare të shkencës, të arsimit, të artit dhe të kulturës për mbështetjen dhe promovimin e një imazhi të ri për vendin tonë dhe rajonin, si simbole të bashkëjetesës paqësore e udhërrëfyes në ndërtimin e saj.

b) Realizon dhe financon projekte inovative të studentëve, studiuesve, artistëve, kuratorëve, gazetarëve e aktivistëve të shoqërisë civile, për sigurimin e mjeteve e të mundësive për ndikimin e politikave publike dhe krijimin e një dialogu të gjerë që siguron institucione të hapura, transparente e më pranë qytetarëve.

c) Zbaton dhe kontribuon në strategjitë dhe politikat e qeverisë në mbështetje të studiuesve, artistëve, qendrave të ekselencës, qendrave të hulumtimit dhe komunikimit.

ç) Zbaton strategjitë qeveritare dhe kontribuon në promovimin dhe institucionalizimin e dialogut ndërmjet grupeve sociale, kulturore, etnike, fetare dhe politike, si pjesë përbërëse e kulturës demokratike në rajon.

d) Në kuadër të strategjive qeveritare, krijon dhe zhvillon instrumente mbështetëse, si dhe nxit e mbështet nisma inovative në fushën e dialogut, bashkëpunimit dhe bashkëjetesës.

dh) Vlerëson dhe ofron mbështetje teknike për hartimin, rishikimin dhe sigurimin e përputhshmërisë së strategjive qeveritare me misionin e përcaktuar në shkronjën “a” të kësaj pike.

e) Nxiti dhe promovon bashkëpunimin me sektorin privat për mbështetjen e misionit të përcaktuar në pikën 3, të kreut I, të këtij vendimi, si dhe për zhvillimin e iniciativave inovative në fushën e artit, shkencës dhe kërkimit.

ë) Zhvillon dhe koordinon bashkëpunime dypalëshe dhe shumëpalëshe me institucione të sektorit publik dhe privat, vendës dhe të huaj, në funksion të realizimit të misionit të përcaktuar në pikën 3, të kreut I, të këtij vendimi.

f) Kontribuon në krijimin dhe zhvillimin e kushteve për bashkëpunim profesional dhe shkëmbim ekspertize ndërmjet politikëbërësve, akademikëve, ekspertëve ndërkombëtarë dhe personaliteteve të fushës së artit dhe kulturës, në funksion të realizimit të misionit të përcaktuar në pikën 3, të kreut I, të këtij vendimi.

g) Kontribuon, në përputhje me misionin e institucionit, në hartimin dhe përmirësimin e politikave dhe kuadrit ligjor në fushën e artit, arsimit, rinisë dhe mbështetjes së grupeve vulnerabël.

III ORGANIZIMI DHE FUNKSIONIMI I QENDRËS PËR HAPJE DHE DIALOG (COD)

1. COD-i e shtrin veprimtarinë e tij në të gjithë territorin e Republikës së Shqipërisë dhe organizohet në formën e drejtorisë së përgjithshme, në nivel qendror.

2. COD-i drejtohet nga drejtori i përgjithshëm i cili organizon dhe drejton të gjithë veprimtarinë e tij, përfaqëson qendrën në marrëdhënie me të tretët dhe përgjigjet përpara Kryeministrit.

3. Drejtori i përgjithshëm emërohet, lirohet dhe shkarkohet nga Kryeministri.

4. Drejtori i përgjithshëm duhet të plotësojë kriteret e mëposhtme:

a) të jetë shtetas shqiptar;
b) të ketë zotësi të plotë për të vepruar;
c) të ketë diplomë të nivelit “Master shkencor” apo “Master profesional” të përfutur në fund të studimeve të ciklit të dytë me 120 kredite dhe me kohëzgjatje normale 2 vjet akademikë, në një nga degët e arsimit të lartë;

ç) ndaj tij të mos jetë marrë masa disiplinore e largimit nga puna;

d) të mos jetë dënuar me vendim gjyqësor të formës së prerë për kryerjen e një vepre penale.

5. Drejtori i përgjithshëm lirohet nga detyra kur:

a) deklarohet i paaftë për punë nga komisioni kompetent mjekësor apo merr formë të prerë vendimi gjyqësor për kufizimin apo heqjen e zotësisë për të vepruar;

b) plotëson kushtet për pension pleqërie;

c) i hiqet e drejta për të ushtruar funksione publike me vendim gjyqësor të formës së prerë;

ç) nuk përmbush objektivat strategjike të institucionit;

d) gjendet në një situatë konflikti të vazhdueshëm interesi;

dh) ristrukturohet institucioni;

e) jep dorëheqjen nga detyra.

6. Drejtori i përgjithshëm shkarkohet nga detyra, kur:

a) dënohet me vendim gjyqësor të formës së prerë për kryerjen e një krimi apo për kryerjen e një kundërvajtjeje penale me dashje;

b) kryen shkelje të rënda gjatë detyrës;

c) ka performancë të dobët në ushtrimin e detyrës;

ç) kryen veprimtari që krijon konflikt interesash, në përputhje me legjislacionin e konfliktit të interesave;

d) mungon në detyrë, pa shkaqe të arsyeshme, për më shumë se 30 (tridhjetë) ditë në vijim/radhazi.

7. Struktura dhe organika e COD-it miratohen nga Kryeministri, sipas përcaktimeve në legjislacionin në fuqi për organizimin dhe funksionimin e administratës shtetërore.

8. Funksionimi i COD-it përcaktohet nëpërmjet rregullores së brendshme e cila përgatitet nga drejtori i përgjithshëm dhe miratohet nga Kryeministri, me propozimin e drejtorit të përgjithshëm.

9 Marrëdhëniet e punës së drejtorit të përgjithshëm, nëpunësve dhe punonjësve administrativë të COD-it rregullohen sipas dispozitave të Kodit të Punës.

10. COD-i ka stemën, logon dhe vulën e vet zyrtare. Stema e COD-it përbëhet nga stema e Republikës së Shqipërisë, me shënimet: “Republika e Shqipërisë, Kryeministria, Qendra për Hapje dhe Dialog”, në përputhje me përcaktimet e vendimit të Këshillit të Ministrave për mënyrën e përdorimit të stemës së Republikës së Shqipërisë.

11. Vula e COD-it ka formën dhe elementet e përcaktuara në vendimin e Këshillit të Ministrave për rregullat e prodhimit, të administrimit, kontrollit dhe ruajtjes së vulave zyrtare. Vula prodhohet, administrohet dhe ruhet në përputhje me legjislacionin në fuqi.

IV. DISPOZITA KALIMTARE DHE TË FUNDIT

1. COD-i vijon funksionimin si pjesë e Agjencisë për Dialog dhe Bashkëqeverisje deri në fillimin e funksionimit të plotë të tij, moment në të cilin COD-i merr përsipër në mënyrë të pavarur ushtrimin e kompetencave dhe përgjegjësi të përcaktuara me këtë vendim.

2. Ngarkohen Kryeministria, Agjencia për Dialog dhe Bashkëqeverisje dhe Qendra për Hapje dhe Dialog (COD) për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTËR
Edi Rama